

Evening Dogri (NSD) Bulletin 04-08-2024

आकाशवाणी

खास खबरां

- 1 राष्ट्रपति द्रौपदी मुर्मू होर अज्ज संजा थमां फिजी, न्यूजीलैंड ते तिमोर लेस्ते दा अपना ऐतिहासक दौरा करै करदियां न।
- 2 मध्यप्रदेश दे सागर जिले च इक मंदरै दी कंध ढेई पौने करी 9 बच्चें दी मौत ते केई जख्मी होई गे न।
- 3 हिमाचल प्रदेश च बददल फटने दी घटना च लापता लोकें दा पता लाने लेई तपाशी अभियान जारी ऐ। हादसे च कुल 44 लोक लापता होई गेदे न।
- 4 केन्द्री गृहमंत्री अमित शाह होरें चंडीगढ़ च हर रोज 24 घैंटे कम्म करने आली मनीमाजरा पानी सप्लाई परियोजना दा उद्घाटन कीता ऐ।
- 5 पैरिस ओलंपिक च भारती हॉकी टीम नै पैनेल्टी शूट आउट च ग्रेट ब्रिटेन गी 4-2 कन्नै हराइयै सैमी फाइनल च पुज्जी गई ऐ।

<><><><><><>

President Murmu

राष्ट्रपति द्रौपदी मुर्मू त्रै मुख्यें फिजी, न्यूजीलैंड ते तिमोर लेस्ते दी यात्रा आस्तै अज्ज खाना होआरदियां न। इस यात्रा दरान ओह दपक्खी बैठकां लांगन ते प्रवासी भारतीयें कन्नै गल्लबात करगंन। राष्ट्रपति होर संजा 7 बज्जियै 45 मिंटे पर वायु सेना दे पालम स्टेशन थमां खाना होंगन। एह भारत दे कुसै बी राष्ट्रपति दी फिजी ते तिमोर लेस्ते दी पैहली यात्रा होग। अपने दौरे दरान राष्ट्रपति होरें इनें मुख्यें कन्नै दपक्खी बैठकां लांगन ते भारत दे इनें मुख्यें कन्नै रिश्ते गी होर मजबूत करने ते रिश्ते गी होर व्यापक बनाने पर चर्चा करगंन।

श्रीमती मुर्मू हुंदी त्रै मुल्खें दी यात्रा कन्नै भारत दी एक्स ईस्ट नीति गी होर गति थहोग।

<><><><><><>

M.P

मध्यप्रदेश दे सागर जिले च अज्ज बडलै इक मंदरै दी कंध ढेहई पौने करी 9 बच्चें दी मौत होइ गई ते केइं जनें जख्मी होइ गे। एहू हादसा शाहपुर च हरदौला बाबा मंदरै च इक धार्मिक कार्यक्रमें दरान पेश आया। जख्मिणं गी उत्तुआं कडिडयै इलाज लेई अस्पताल पजाया गेआ ते प्रशासन नै तुरत बचाह अभियान बी शुरू करी दित्ता। सागर जिले दे कलैक्टर दीपक आर्या होरें दस्सेआ जे किश बच्चे जख्मी होए दे न जिंदा इलाज चलै करदा ऐ। उनें दस्सेआ जे हादसे आली थाहरै थमां सारा मलबा हटाइ दितता गेआ ऐ। मुख्यमंत्री मोहन यादव होरें मंदे भागें आली इस वारदात पर डूंहगा दुख ते बसोस जताया ऐ। उनें मारे गेदे बच्चें दे परोआरें गी 4-4 लक्ख रुपें दी सिधि सहायता दा ऐलान कीता ऐ।

<><><><><><>

Gov. Conference

गवर्नरें दा दऊं दिनें दा सम्मेलन कल राष्ट्रपति भवन च सम्पन्न होई गेआ। राष्ट्रपति द्रौपदी मुर्मू होरें वयापक चर्चा लेई गवर्नरें दे सांझे जतनें दी सराहना कीती। अपने समापन भाषण च उनें इस गल्लै दी खास तौर पर सिफ्त कीती जे गवर्नरें दे बक्ख-बक्ख समूहें, अपने दफ्तरें ते लोकें दे कल्याण लेई बेशकीमती विचार ते मशवरे सांझे कीते न। समापन सत्र गी संबोधत करदे होई उपराष्ट्रपति जगदीप धनखड़ होरें आखेआ जे गवर्नरें गी राज्य सरकारें थमां लोड़चदी जानकारी हासल करने ते लगातार संपर्क बनाई रखने च कोई झिझक नेई होनी लोड़चदी।

<><><><><><>

Shobana

अनुभवी गांधीवादी ते समाज सेविका शोभना रानाडे हुंदे अज्ज 100 ब'रे दी बरेसू च पुणे च काल होई गेआ। उनेंगी सामाजिक कम्में आस्तै 2001 ब'रे च पद्म भूषण कन्नै सम्मानत कीता गेआ हा। श्रीमती रानाडे हुंदे महिलाएं दे बचाह लेई कीते गेदे कम्म कदें बी नेई भुलने जोग न।

<><><><><><>

Army-HP

हिमाचल प्रदेश दे शिमला, मंडी ते कुल्लु जिलें च बददल फटने दी घटना च लापता लोकें दा पता लाने लेई अज्ज उपरोतली चौथे रोज बी जारी ऐ। राज्य च बददल फटने दिएं बक्ख-बक्ख घटनाएं च कुल 44 लोक लापता न। इंदे चा 36 लोक शिमला, जिले च रामपुर दे सामेज इलाके च लापता न। लापता लोकें दा पता लाने लेई एनडीआरएफ ते एसडीआरएफ दिएं आमीं गी लोडचदे आधुनिक उपकरणें कन्नै लैस कीता गेदा ऐ। शिमला दे डिप्टी कमीशनर अनुपम कश्यप होरें उत्थें बने दे मजूदा हालात दा जायजा लैता ते आखेआ जे अभियान लेई लाए गेदे बलें दी गिनतरी च बाद्धा कीता जाग। उनें गलाया जे इस कुदरती करोपी दी मारे हेठ आए दे इलाकें च जरूरी सेवा उपलब्ध करोआने लेई लोक निर्माण विभाग, जल शक्ति विभाग ते खुराक ते सप्लाई मैहकमे गी जरूरी निर्देश जारी करी दित्ते गेदे न। जनजातीय आबादी आले जिले लाहौल-स्पीती दी दारचा-शिंगुला शिडकें पर जंदी चिरें रातीं बददल फटने करी सीमी सडक संगठन दे दऊं पुल तबाह होई गे। इस करी दारचा-शिंगुला जस्कार शिडकै पर गडिडएं दी आओजाई रोकनी पेई गई। तोआई फौज नै हिमाचल प्रदेश दे शिमला ते मंडी जिलें च प्रभावत इलाकें च मनुक्खी सहायता ते आपदा राहत अभियानें गी होर तेज करी दित्ता ऐ। फौज मूजब सामेज इलाके च तकरीबन 90 लोकें गी उत्तुआं कडिडयै फौज दे मैडिकल कैप च इलाज दी सुविधां उपलब्ध

करोआईं गेईं ऐ। फौज आस्सेआ सामेज इलाके प्रभावत लोकें गी रूट्टी ते दवाइएँ सनें होर दुआ जरूरी समेयान पजाने आस्तै दऊं पैदल टुरने आले पुल बी बन्ने गे न। फौज दे अधिकारिएँ दा आखना ऐ जे ओह अगगे बी राज्य दी बचाह टीम ते सिविल प्रशासन कन्नै रलियै कम्म करदे रौंहगन।

<><><><><><>

Cloud Brust

जम्मू कश्मीर दे गांदरबल जिले च बद्दल फट्टने करियै इक शिड़कै गी नुक्सान पुज्जा ऐ, जिस करियै श्रीनगर—लेह राश्ट्रीय जरनैली शिड़क बंद होई गेई ऐ। इक पुलस अफसर नै दस्सेआ जे बद्दल फट्टने करियै चानचक्क आए दे हाड़ करियै ना शड़ा घरे ते किश इमारतें गी नुक्सान पुज्जा सगुआं शिड़कै गी बी नुक्सान होआ ऐ। अफसर नै दस्सेआ जे जरूरतमंद लोकें दी मदद ते राहत ताईं अफसर मौके पर मजूद न। जरनैली शिड़कै दे बंद होने करियै कश्मीर घाटी—लद्दाख थमां कटोई गेई ऐ जिल्ले के श्री अमरनाथ यात्रा आस्तै बालटाल आधार शिविर पुज्जना बी मुश्कल होई गेआ ऐ।

<><><><><><>

VDG

केन्द्री मंत्री डॉ. जितेन्द्र सिंह होरें आखेआ ऐ जे जम्मू खित्ते च बधा'रदियां आतंकी घटनाएं कन्नै निबड़ने आस्तै ग्राएं—पिंडे दी राखी हिफाजत आस्तै वीडीडी गी आधुनिक थेआरें कन्नै लैस कीता जाग। जम्मू संभाग दे कठुआ जिले च “विकसित भारत ताईं नोजवानें गी सशस्त्र बनाना” इस कार्यक्रम च बोलदे होई डॉ. सिंह होरें आखेआ जे सरकार नै आतंकी हमले कन्नै निबड़ने लेई नेकां गैईं पुट्टियां न। उनें गलाया जे वीडीडी गी नमें सिरेया तैआर करने ते उंदे थेआरें गी आधुनिक बनाने पर बचार कीता जा'रदा ऐ। उंदी एह टिप्पणी पिछले किश म्हीने दरान टकोहदा करियै जम्मू खित्ते च आतंकवादी गतिविधिएं च बाद्धे मगरा आई ऐ। पिछले म्हीने डॉ. सिंह होरें घोषणा कीती ही जे आतंकवाद प्रभावत

इलाके च वीडिजी गी नमें सिरैया तैआर कीता जा'रदा ऐ तां जे उनेंगी आतंकवादिएं कन्नै लड़ने लेई सशक्त बनाया जाई सकै। वीडिजी गी असरदार ढंगै नै चुनौती दा मकाबला करने लेई एसएलआर रैफल सनें होर थेआर दित्ते जाई सकदे न।

<><><><><><>

Amarnath Yatra

श्री अमरनाथ श्राईन बोर्ड दे अफसरें दस्सेआ जे अज्ज 1 ज्हार 112 शिव भक्तें दा नमां जत्था जम्मू थमां कश्मीर घाटी लेई रवाना होआ। पिदले 36एं दिनें थमां जारी सलाना यात्रा दरान 4 लक्ख 90 ज्हार शा बद्ध श्रद्धालु पवित्र गुफा च बने दे शिवलिंगम दे दर्शन करी चुके दे न। अज्जै दा जत्था भगवती नगर यात्री निवास थमां बडलै 3 बज्जियै 25 मिंटे पर शिवें दे जयकारें लांदे होई दऊं सुरक्षा काफलें च घाटी लेई रवाना होआ। पवित्र गुफा दक्खन कश्मीर हिमालय च समुंद्र तल थमां 3 ज्हार 888 मीटर दी उंचाई पर स्थित ऐ, श्रद्धालु रिवायती पहलगाम ते बालटाल आले रस्ते थमां होइयै बर्फू कन्नै बने दे भगवान दे शिवलिंग रूपे च दर्शन करदे न। पहलगाम आला रस्ता 48 किलोमीटर जिल्ले के बालटाल थमां मंदर दी दूरी 14 किलोमीटर ऐ। दौनें रस्ते पर यात्रुएं लेई हेलीकाप्टर सेवा उपलब्ध ऐ। इस ब'रे दी यात्रा कुल 52 दिनें दी ऐ, जेहड़ी 19 अगस्त गी रक्खड़ पुन्नेआ पर मुकम्मल होग।

<><><><><><>

Chari Mubarak

स्वामी अमरनाथ जी दी पवित्र छड़ी मुबारक ऐतिहासक शंकराचार्य मंदर लेती गेई। दशनामी अखाड़े आस्सेआ दित्ती गेदी जानकारी मूजब स्वामी अमरनाथ जी दी पवित्र छड़ी दी अगुवाई महंत दिपेन्द्र गिरी होरें कीती। एह छड़ी हरियाली अमावस्या दे मौके पर शंकराचार्य मंदर पुज्जी। उत्थें पूरे वैदिक मंत्र उच्चारण

कन्नै पूजा अर्चना कीती गई। इस मंदर गी पैहले ज्योतिशवर मंदर बी आखेआ जंदा हा आदि शंकराचार्य हुंदे इस मंदर दे दौरे मगरा इसी शंकराचार्य मंदर आखेआ जान लगी पेआ। सोमवारें छड़ी मुबारक गी शारिका—भवानी मंदर हरि पर्वत पर लैता जाग।

<><><><><><>

Amit Shah

गृहमंत्री अमित शाह होरें अज्ज चंडीगढ़ दे मनीमाजरा च 24 घैंटे पानी उपलब्ध करोआने आली इक प्रायोजिक परियोजना दा उद्घाटन कीता। श्री शाह होरें आखेआ जे इस परियोजना कन्नै मनीमाजरा दे तकरीबन 1 लक्ख लोकें गी लाह पुज्जोग। उनें दस्सेआ जे इस परियोजना पर कोई 75 करोड़ रपे खर्च कीते गे न। एहदा मकसद 24 घैंटे तेजिया कन्नै पानी उपलब्ध करोआइयै पानी दी बर्बादी गी बचाना ऐ। एहदे दुए लक्ष्य च पानी दी लीकेज च कमी, स्मार्ट मीटरिंग ते ऊर्जा खपत दी निगरानी राएं जल संसाधन च बांठा करना मुख्ख न। इस परियोजना लेई कुल 22 किलोमीटर लम्मी पानी सप्लाई पाईपलाइन बछाई गेदी ऐ ते कन्नै जिमीं हेठ पानी दे दऊं बड़्डे सरोवर बी बनाए गेदे न, जिंदी हर रोज 20—20 लक्ख गैलन पानी दी समर्थ ऐ।

<><><><><><>

Olympics

पैरिस ओलंपिक्स च भारतीय हॉकी टीम पैनेल्टी शूट आउट च ग्रेअ ब्रिटेन गी 4—2 कन्नै हराइयै सैमी फाइनल च पुजजी गई ऐ। 42 मिंटे तगर इक खडारी घट्ट होने दे बावजूद बी भारतीय टीम नै मैच च अपना दबदबा बनाइयै रखेआ। भारत लेई पैहला गोल हरमनप्रीत सिंह नै कीता। ब्रिटेन दे ली मोर्टून नै बराबरी दा गोल दागेआ जेहूदे मगरा मैच दा फैसला पैनेल्टी शूट आउट कन्ने होआ, जेहूदे च भारत नै 2 दे मकाबले 4 गोल करियै जित्त हासल कीती।

<><><><><><>

Cricket

भारत ते श्रीलंका बश्कार खेड्डी जा'रदी 3 इक दिनी अंतराष्ट्रीय क्रिकेट मैचें दी श्रृंखला दा दूआ मैच अज्ज आर.प्रेमदासा स्टेडियम च खेड्डेआ जा'रदा ऐ। श्रीलंका नै टॉस जित्तिथै पैह्ले बल्लेबाजी करने दा फैसला लैता ते भारत सामने जित्त लेई 241 रंजें दा लक्ष्य रखेआ ऐ। खीरी खबरा थोने तगर भारत नै बगैर विकेट दे नुक्सान पर 11 ओवर पर 80 रंज बनाई लैते दे न।

<><><><><><>